

til þess að öðlast þegar gildi og birtist til eftirbreytni öllum þeim, sem hlut eiga að máli.

Félagsmálaráðuneytið, 8. marz 1962.

F. h. r.

Hjálmar Vilhjálmsson.

Jón S. Ólafsson.

16. marz.

Nr. 20.

S A M Þ Y K K T

um afgreiðslutíma verzlana í Hafnarfirði.

1. gr.

Sölubúðum í Hafnarfirði skal lokað dag hvern eigi síðar en segir í samþykkt þessari.

2. gr.

Alla virka daga ársins skal sölubúðum lokað eigi síðar en kl. 18 og þær ekki opnaðar aftur fyrr en kl. 7.30 árdegis næsta virkan dag. Þó skulu frá þessu þær undantekningar, er nú skal greina, sbr. 3. gr.: Aðfangadag jóla og gamlársdag skal sölubúðum lokað eigi síðar en kl. 12. Síðasta virkan dag fyrir aðfangadag jóla er heimilt að halda sölubúðum opnum til kl. 24. Síðasta laugardag fyrir jól (annan en Þorláksmessudag, ef hann ber upp á laugardag) eða annan virkan dag skömmu fyrir jól, er heimilt að halda sölubúðum opnum til kl. 22.

Á tímabilinu frá 1. okt. til 30. apríl skal loka eigi síðar en kl. 13 á laugardögum, og á tímabilinu frá og með 1. maí til 30. sept. skal loka eigi síðar en kl. 12 á laugardögum. Allt árið er heimilt að hafa sölubúðir opnar til kl. 19 á föstudögum. Enn fremur getur bæjarstjórn að fengnu samþykki Verzlunarmannafélags Hafnarfjarðar, Kaupmannafélags Hafnarfjarðar og Kaupfélags Hafnfirðinga með sérstakri samþykkt heimilað, að sölubúðir séu opnar til kl. 22 einn virkan dag í viku hverri allt árið eða hluta úr ári. Þá er heimilt að hafa opið fyrsta laugardag í desember til kl. 16 og annan laugardag í desember til kl. 18.

3. gr.

Almenna helgidaga þjóðkirkjunnar, sumardaginn fyrsta, 17. júní og fyrsta mánudag í ágúst mega engar sölubúðir vera opnar, sbr. þó 5., 6. og 7. gr. Hinn 1. maí skal sölubúðum lokað kl. 12 á hádegi, ef þann dag ber upp á virkan dag.

4. gr.

Brauð- og mjólkursölubúðum má halda opnum á almennum helgidögum, sumardaginn fyrsta, 17. júní og fyrsta mánudag í ágúst frá kl. 10 f. h. til kl. 2 e. h. eingöngu til sölu á brauðvörum, mjólk og mjólkurvörum.

5. gr.

Ákvæði samþykktar þessarar ná ekki til sölu lyfja né sjúkrahalda lyfjaverzlunar í bænum.

6. gr.

Bæjarstjórn getur leyft, að vikið sé frá framangreindum ákvæðum um lokunartíma sölubúða, þegar um er að ræða:

a) Bifreiðastöðvar, biðskýli og verzanir, sem hafa sérstakt leyfi bæjarstjórnar og heilbrigðisnefndar til að verzla með takmarkaðan fjölda vörutegunda, nánar til tekið: Blöð, tóbaksvörur, öl, sælgæti, gosdrykki og ís, brauðvörur og mjólk.

b) Veitingastaðir, sem samkvæmt sérstöku leyfi bæjarstjórnar og heilbrigðisnefndar, selja heitar máltíðir og kaffi, enda sé sú starfsemi meginhluti rekstursins að dómi heilbrigðisnefndar. Veitingastaðir, sem um ræðir í b-lið, skulu undanþegnir gjaldi því, sem um ræðir í þessari grein.

Í verzlunarstöðum þessum má sala fara fram á virkum og helgum dögum kl. 7.30 til 23.30, þó skal lokað föstudaginn langa, páskadag, hvítasunnudag, 17. júní, jóladag, aðfangadag jóla og gamlársdag skv. því sem segir í 2. gr.

Bæjarstjórn veitir heimild til verzlunarreksturs samkv. þessum greinum, og eru leyfin bundin við nafn handhafa auk götu og húsnúmers, sömuleiðis hefur bæjarráð heimild til að afturkalla leyfin, hvenær sem er, ef leyfisskilyrðum eða reglum varðandi reksturinn er ekki fylgt. Fyrir leyfi til verzlunarreksturs samkvæmt þessari grein, skal leyfishafi greiða árlegt gjald til bæjarsjóðs, er greiðist ársfjórðungslega fyrirfram. Bæjarstjórn ákveður gjald þetta til eins árs í senn. Gjald þetta má innheimta með lögtaki. Bæjarstjórn er heimilt að setja nánari reglur um einstök leyfi til verzlunarreksturs samkvæmt þessari grein.

7. gr.

Eftir lokunartíma sölubúða er óheimilt að selja á strætum og torgum eða annars staðar utan verzlana nokkurn þann varning, sem verzlunarleyfi þarf til að selja.

Heimilt er þó að selja eftir lokunartíma kol, salt, oliur, veiðarfæri og vistir til skipa, sömuleiðis er heimilt að veita viðtöku vörum aðkomumanna í geymsluhús verzlana.

8. gr.

Heimilt er að afgreiða eftir lokunartíma sölubúða þá, sem komnir eru inn í verzlunina fyrir lokunartíma.

9. gr.

Heimilt er lögreglustjóra að veita undanþágu frá samþykkt þessari fyrir einstaka daga, ef sala verzlunarinnar fer fram til ágóða fyrir góðgerðastofnanir og fyrirtæki að dómi lögreglustjóra.

10. gr.

Brot gegn samþykkt þessari varða sektum 100.00—5000.00 krónum, og renna sektirnar í bæjarsjóð. Mál út af brotum gegn samþykkt þessari skal reka að hætti opinberra mála.

Samþykkt þessi, sem er gerð af bæjarstjórn Hafnarfjarðar, samkvæmt lögum nr. 17 1. febrúar 1936, staðfestist hér með og birtist til eftirbreytni öllum þeim, sem hlut eiga að máli.

Jafnframt er úr gildi felld samþykkt nr. 97 19. júní 1944, um lokunartíma sölubúða og takmörkun á vinnutíma sendisveina í Hafnarfirði með áorðnum breytingum.

Félagsmálaráðuneytið, 16. marz 1962.

F. h. r.

Hjálmar Vilhjálmsson.

Gunnlaugur Þórðarson.